

Էջմիածին գիւղին հիւսիս-արեւմտեան կողմը, կարկաջահոս և ծիծաղագնաց Քարցաղ գետին մօտերը, գեանափոր ջուր կը հանէ, որ ստորերկրեայ ճամբով, հիւսիսային կողմէ կը հասնի մինչև վեհարանին պարտէզը, ուր առու կազմելով կ'ընթանայ դէպի վանքին պարիսպը և շեղելով հարաւային կողմը, կը խառնուի Փիւլիպպոս կաթողիկոսին գեանափոր ջուրին և միասին կ'ոռոգէ ներքին դաշտը, որ կը գտնուի Գայիանէի վանքին ներքև, մինչև Շորաքեաթ, Ղուուղ և մեծ ծովակը: Զամբուի հեղինակը կ'ըսէ. «Այս ջրովս գրեթէ կեան և կենցաղավարին աթոռայինքս և գիւղականքն ըստ մեծի մասին: Քանզի յայտմանէ և ճիւղ մի բաժանեալ մտանէ ի մերձ պարիսպն միաբանից, որով ոռոգին բոյսք և ծառք պարսպին և լուանին և զովանին միաբանքն հանապազ: Ի վերայ այսր ջրոյս շինեաց այս երանելիս ի հարաւակոյս մերձ Սուրբ Աթոռոյն զջրաղացն՝ որ Քանքանի ջրաղաց ասի, որ և գոյ չէն մինչև ցայսօր (1763-1780), և բանի ի յամառն և ի ձմեռն» (36):

Յակոբ Զուղայեցի գեանափոր ջուր կամ «քանքան» կը հանէ նաև կաթողիկոսանիստ վանքին հարաւային կողմը: Ասոր ալը եւս Քարցաղ գետէն է, Ալիբեկլու գիւղին հանդիպակաց. ան զառիվայր կ'ըն-